

- केन्द्र सरकार नमो ड्रोन दीदी योजना रा संचालन सारू दिशा-निर्देश जारी करया।
- रोशनी रा तिवार दीपोत्सव री कड़ी मांय आज कुछ ठोडां दीवाळी-केई ठोडां गोवर्धन अर अन्नकूट रा आयोजन।
- दिवाळी स्नेह मिलन अर रामा-श्यामा रे साथे ई उपचुनाव वाळा हलकां मांय जनसम्पर्क तेज।
- अंतर्राष्ट्रीय ख्यातनाम पुष्कर महोत्सव रे तैत काले ऊं पशु मेळा री सरूआत।

000

केन्द्र सरकार नमो ड्रोन दीदी योजना रा संचालन सारू दिशा-निर्देश जारी करया है। कृषि अर किसान कल्याण मंत्रालय दीनदयाल अंत्योदय योजना-राष्ट्रीय ग्रामीण आजीविका मिशन रे तैत एक हजार 261 करोड़ रिप्या री मंजूरी ई योजना सारू दी ही। इण मांय महिला स्वयं सहायता समूहां ने ड्रोन मुहैया कराया जावे। चालता रोकड़ बरसा ऊं साल 2026 ताई साढे 14 हजार चुणी ज्या महिला स्वयं सहायता समूहां ने ड्रोन देवण रो लगस राखी ज्यो है। ड्रोन अर इण रा पुर्जा री लागत रो अस्सी फीसदी हिस्सो महिला स्वयं सहायता समूहां ने दियो जाएला। जिण ऊं वे ड्रोन खरीद सकेला। इण सहायता री बत्ती ऊं बत्ती रकम आठ लाख रिप्या है। महिला स्वयं सहायता समूहां रा किण ई एक सदस्य ने ड्रोन पायलट रा रूप मांय सिखावण दी जाएला। साथे ई कृषि पोषक तत्वां अर कीटनाशकां ने काम मांय लेवण री अलग ऊं सिखावण दी जाएला।

000

केंद्रीय युवा मामला अर खेल मंत्री डॉ. मनसुख मांडविया नौजवानां ऊं राष्ट्रीय युवा पुरस्कार 2022-23 सारू अर्जियां देवण सारू अरज करी है। अ ईनाम सामाजिक सेवा, मानवाधिकारां ने बधावो देवण अर न्यारा न्यारा हलकां मांय ठावां योगदान सारू लोगां अर संगठनां ने दिया जावे है। ई ईनाम सारू 15 नवम्बर ताई अर्जी ऑनलाइन दी जा सके है। ईनाम मांय तमगो, प्रमाण पत्र अर व्यक्तिगत श्रेणी मांय एक लाख रिप्या री रकम अर संगठन ने तीन लाख रिप्या नकद दिया जावे है। एक वीडियो संदेश मांय, डॉ. मांडविया कयो कै अ ईनाम सराहना रे साथे ई युवा अगुवाई रो सन्मान है।

000

रोशनी रा त्यौहार दीवाळी रा दीपोत्सव रे तैत आज कुछ ठोडां दीवाळी मनाई जावे। ई बार अमावस्या री तिथि दो दिन रहेवण रे कारण ओ व्हे रियो है। वठे ई केई ठोडां गोवर्धन अर अन्नकूट महोत्सव राखी ज्या है। कार्तिक अमावस्या रे दूजे दिन गोवर्धन पूजा करी जावे। गाय रा गोबर ऊं गोवर्धन बणा र फूल अर दीया जगार पूजन करयो जावे। उठी ने मिन्दरां मांय अन्नकूट बणा र प्रसादी बांटी जाय री है। पुष्टी मार्गीय प्रधान पीठ राजसमंद रा नाथद्वारा रा श्रीनाथजी मिन्दर मांय आज रीत मुजब अन्नकूट उत्सव मनायो जावे।

वागड़ हलका रा बेणेश्वर धाम माथे श्रद्धालुआं री घणी भीड़ है। म्हारा डूंगरपुर खबरनवीस बतायो के सोम, माही अर जाखम नदियां रा संगम थळ माथे आज घणी तादाद मांय लोग पवित्र डुबकी लगाई।

चूरू रा नामी सालासर बालाजी मिन्दर मांय ई देश रा कोंणा-कोंणा ऊं श्रद्धालु पूग्या है। म्हारा खबरनवीस बतायो के संवारा ऊं ई दर्शानियां री भीड़ देखी जावे।

उठी ने ब्रज हलका रा भरतपुर मांय घणकरी ठोडां गोवर्धन पूजा काले करी जाएला। राजधानी जयपुर रा गोविन्ददेव जी समेत दूजा मिन्दरां मांय होवण वाळा अन्नकूट महोत्सव माथे सजायी जावण वाळी छप्पनभोग झांकी री तैयारियां जोर-शोर ऊं करी जावे।

उदयपुर रा महालक्ष्मी मिन्दर मांय अन्नकूट महोत्सव आज मनायो जावे। वठे ई जगदीश मिन्दर मांय गोवर्धन पूजा अर अन्नकूट रा आयोजन काले व्हेला। सवाईमाधोपुर रा रामेश्वर धाम रा त्रिवेणी संगम माथे घणी तादाद मांय लोग पवित्र स्नान करने दान-पुण्य करयो। प्रदेशभर मांय लोग एक-दूजा ने दीवाळी री बधाई अर शुभकामना दे रिया है। रामा-श्यामा करण रे साथे ई मिठाईयां अर निजरानां ई लिया-दिया जावे। टोंक रा मालपुरा मांय नेहरु युवा केन्द्र अर मानव सेवा समिति कानी ऊं जरूरतमंदां ने नुवा कपड़ा बांटी ज्या।। पुलिसकर्मियां री दीवाळी आज है। काले ड्यूटी माथे तैनात रेहवण रे कारण वे आज ओ तिवार मना रिया है। टोंक पुलिस अधीक्षक विकास सांगवान पुलिसकर्मियां ने मिठाई बांटने वां रे साथे दीवाळी मनाई। दीवाळी रे साथे ई स्नेह मिलन जळसा रो सिलसिलो ई सरु व्हे ग्यो है।

मुख्यमंत्री भजनलाल शर्मा आज जयपुर रा सांगानेर मांय दीवाळी स्नेह मिलन मांय शिरकत करी। ई मौके वणां कयो के उमंग अर उल्लास रो ओ तिवार एक-दूजा ने जोड़ण रो संदेश देवे है। केंद्रीय कानून मंत्री अर्जुनराम मेघवाल आज बीकानेर मांय बीएसएफ जवानां ने साथे दीवाळी रो तिवार मनायो। वणा दीप जगार जवानां रो मुंह मीठो करवायो अर खुशी मनाई।

जैन धर्म रा 24वां तीर्थंकर भगवान महावीर स्वामी रो निर्वाण उत्सव ई आज मनायो जावे। ई मौके टोंक मांय महावीर स्वामी री मूरत माथे जलाभिषेक करी ज्यो अर निर्वाण लड्डू चढ़ायी ज्यो।

सामाजिक सौहार्द अर समरसता रा तिवार दीवाळी री रामा-श्यामा रे साथे ई उपचुनाव सारु प्रचार गति पकड़ ली है। प्रदेश री सात विधानसभा सीटां माथे 13 नवम्बर ने होवण वाळा उपचुनाव सारु नाम पाछा लेवण रे पछे उम्मीदवारां रा स्थिति तैय व्हे गयी है। सब ऊं बत्ती 12-12 उम्मीदवार दौसा अर खींवर चुणाव हलका मांय है। म्हारा नागौर खबरनवीस बतायो के उम्मीदवार तिवारी रामा-श्यामा रे साथे ई जनसम्पर्क कर रिया है।

.....

दौसा मांय ई प्रचार रो काम ज़ोर पकड़ रियो है। स्वीप गतिविधियां री मार्फत मतदातावां मांय जाग जगाई जावे। अठै उपचुनाव सारु 240 पोलिंग बूथ बणायी ज्या है।

000

नेशनल स्टॉक एक्सचेंज अर बॉम्बे स्टॉक एक्सचेंज आज सालाना दीवाळी मुहूर्त कारोबार सत्र राख्यो। इण रे साथे ई नुवा कैलेंडर सम्वत् 2081 री सरुआत व्हेला। एनएसई मुजब प्री-ओपन ट्रेडिंग सेशन 15 मिनट सारु अर सामान्य ट्रेडिंग सेशन एक घंटा सारु सिज्यां छह बज्यां ऊं सात ताई राख्यी ज्यो है। भारतीय शेयर बाजार दीवाळी रे दिन मुहूर्त कारोबार सत्र राखे है।

000

रेल टिकिटां रा रिजर्वेशन रा नुवा नियम आज ऊं लागू व्हे गया है। रेलवे रिजर्वेशन री बगत हद एक सौ बीस दिन ऊं घटा र साठ दिन कर दी है। फेरुई ई साल 31 अक्टूबर ताई आरक्षित टिकट लागू रेहवेला। रेल मंत्रालय मुजब साठ दिन पैला रा रिजर्वेशन ऊं टिकिट जमा करण रो अंदेशों कम व्हेला अर जातरियां ने बत्ती टिकिट मिल सकेला। उठी ने तिवारी सीजन मांय बध्या जातरी भार ने देखता उत्तर-पश्चिम रेलवे आज बीस खास रेलगाडियां चलावे। इण मांय बीकानेर-शिरडी, जोधपुर-मउ स्पेशल, अजमेर-बांद्रा स्पेशल, जयपुर-उदयपुर समेत दूजी गाडियां भेळी है। इण ई तरह काले 26 स्पेशल रेलगाडियां चलाई जावेला। यात्रियां री तादाद ने देखता कोटा ऊं हिसार अर हड़पसर रे बीचे चालण वाळी रेल रा तीन-तीन खास फेरा चलाया जावेल।

000

अंतर्राष्ट्रीय ख्यातनाम पुष्कर महोत्सव रे तैत पशु मेळो काले ऊं भरीजेला। ओ देश रा सब ऊं मोटा पशु मेळा मांय भेळो है। सैलाणी महकमा कानी ऊं पुष्कर महोत्सव रो आयोजन नौ नवम्बर ऊं सरु व्हे र सात

दिन चालेला। वठे ई धार्मिक मेळा मांय 'पंचतीर्थ स्नान' 12 ऊं 15 नवम्बर तांई व्हेला। म्हारी अजमेर खबरनवीस बतायो के मेळा सारु पड़ोसी राज्यां ऊं ई मवेशी पालकां रो आवणो सरु व्हे गयो है।

000

आथूणी राजस्थान मांय प्रवासी पक्षी साइबेरियन सारस आ दिनां डेरो डाल रिया है। अ हजारु किलोमीटर रो सफर करने मंगोलिया, साइबेरिया अर कज़ाकिस्तान ऊं आवे है। वठे आं दिनां बर्फीला मौसम होवण रे कारण अ पखेरु अनुकूल वातावरण सारु भारत आवे है। साइबेरियन सारस ने कुरजां कही जावे है। अ बालोतरा रा पचपदरा रे आरे—सारे लीक हलका मांय झुण्ड मांय निजर आवे।

000